


容齋四筆序

始予作容齋隨筆首尾十八年二筆十三年三筆五年而四筆之成不費一歲身益老而著書益速蓋有其說曩自越府歸謝絕外事獨弄筆紀述之習不可掃除故搜采異聞但緒夷堅志於議論雖黃不復關抱而稚子穰每見夷堅滿紙輒曰隨筆夷堅皆大人素所遊戲今隨筆不加益不應厚於彼而薄於此也日日立案旁必俟草一則乃退重逆其意則哀所憶而書之穰嗜讀書雖就寢猶置一編枕畔旦則與之俱興



而天嗇其付年且弱冠聰明殊未開以彼其勤
殆必有日丈夫愛憐少子此乎見之於是占抒
爲序并獎其志云慶元三年九月二十四日序

容齋四筆序

容齋四筆目錄

第一卷 十九則

孔廟位次

周公作金滕

關雎不同

三館祕閣

十十錢

畢仲游二書

韋孟詩乖疎

西極化人

周三公不特置

雲夢澤

迷癡厥撥

亭榭立名

犀舟

列子與佛經相參

康衡守正

詔令不可輕出

戰國策

范曄漢志

繕修犯土

第二卷 二十則

諸家經學興廢

漢人姓名

輕浮稱謂

鬼谷子書

有美堂詩

張天覺小簡

城狐社鼠

用兵為臣下利

誌文不可宄

趙毅鳴犢

五帝官天下

黃帝李法

抄傳文書之誤

二十八宿

大觀元夕詩

顏魯公帖

文潞公奏除改官制

待制知制誥

裴行儉景陽

北人重甘蔗

第三卷 十六則

韓退之張籍書

韓公稱李杜

此日足可惜

粉白黛黑

李杜往來詩

李太白怖州佐

祝不勝詛

呂子論學

曾太皇太后

中天之臺

實年官年

雷公炮炙論

治藥捷法

陳翠說燕后

燕非強國

水旱祈禱

第四卷 十五則

今日官冗

藥城和張安道詩

和范杜蘇四公

外臺祕要

六枳關

王荆公上書并詩

左黃州表

李郭詔書

兩道出師

杜韓用歇後語

唐明皇賜二相物

一百五日

老杜寒山詩

礪石之毒

會合聯句

第五卷 十四則

土木偶人

饒州風俗

禽畜菜茹不同

伏龍肝

勇怯無常

趙德甫金石錄

韓文公薦士

王勃文章

呂覽引詩書

藍田丞壁記

錢武肅三改元

黃庭換鷺

宋桑林

馮夷姓字

第六卷 十五則

韓文公逸詩

竇叔向詩不存

用柰花事

王廖兒良

徒木憤表

建武中元續書

草駒聾蟲

記李履中二事

乾寧覆試進士

臨海蠲圖

東坡作碑銘

洗兒金錢

告命失故事

扁字二義

娑羅樹

第七卷 十四則

天咫

縣尉為少仙

杜詩用受覺二字

西太一宮六言

由與猶同

人焉廋哉

久而俱化

黃文江賦

沈季長進言

繁遏渠

替戾岡

文潞公平章重事

考課之法廢

小官受俸

第八卷 十七則

庫路真

得意失意詩

狄監盧尹

項韓兵書

承天塔記

穆護歌

省試取人額

通印子魚

壽亭侯印

茸附治疽漏

莆田荔枝

雙陸不勝

華元入楚師

公羊用疊語

文書誤一字

歷代史本末

賢者一言解疑譜

第九卷 十六則

蔣魏公逸史

沈慶之曹景宗詩

藍尾酒

歐陽公辭官

南北語音不同

南舟北帳

魏冉罪大

辨秦少游義倡

姓源韻譜

譽人過實

作文句法

書簡循習

健訟之誤

用史語之失

文字書簡謹目

更衣

第十卷 十七則

過所

露布

東坡題潭帖

山公啟事

親王回庶官書

責降考試官

青蓮居士

閩俗詭祕殺人

富公遷官

唐藩鎮行墨勅

吏部循資格

五行納音

五行化真

錢忠懿判語

王逸少為藝所累

鄂州南樓磨崖

賞魚袋出處

第十一卷

十八則

京丞相轉官

熙寧司農牟利

文與可樂府

譏議遷史

常何

李密詩

寺監主簿

溫大雅兄弟名字

册府元龜

漢高帝祖稱豐公

樞密行香

船名三翼

東坡誨葛延之

用書雲之誤

張鷟譏武后濫官

唐王府官猥下

御史風聞

唐御史遷轉定限

第十二卷

十三則

小學不講

主臣

景華御苑

州陞府而不為鎮

漢唐三君知子

當官營繕

治麻明時

仕宦捷疾

詞臣益輕

夏英公好處

祖宗用人

至道九老

李文正兩罷相

第十三卷 二十四則

科舉之弊不可革

宰執子弟廷試

國初救弊

房元齡名字

二朱詩詞

金剛經四句偈

四蓮華之名

黑法白法

多心經偈

天宮寶樹

白分黑分

月雙閨雙

踰繕那一由旬

七極微塵

宰相贈本生父母官

執政贈三代不同

唐孫處約事

夏侯勝京房兩傳

漢人坐語言獲罪

樞密書史

知州轉運使為通判

范正辭治饒州

榮王藏書

秦杜八六子

第十四卷 十四則

祖宗親小事

王居正封駁

王元之論官冗

梁狀元八十二歲

太祖恤民

潘游洪沈

舞鷗游蜻

郎中用資序

臺諫分職

貞元朝士

表章用兩臣字對

劉夢得謝上表

陳簡齋葆真詩

仙傳圖志荒唐

第十五卷 十五則

徽廟朝宰輔

教官掌箋奏

經句全文對

北郊議論

討論濫賞詞

尺八

三給事相攻

朱藏一詩

蔡京輕用官職

節度使改東宮環衛官

宰相任怨

四李杜

渾脫隊

歲陽歲名

官稱別名

第十六卷 十二則

漢重蘇子卿

昔賢為卒伍

兵家貴於備豫

渠陽蠻俗

寄資官

親王帶將仕郎

郡縣用陰陽字

杜畿李泌董晉

嚴有翼詆坡公

曹馬能收人心

取蜀將帥不利

李嶠楊再思

容齋四筆目錄

容齋四筆卷第一 十九則

孔廟位次

自唐以來相傳以孔門高弟顏淵至子夏爲十哲故坐祀於廟堂上其後升顏子配享則進曾子於堂居子夏之次以補其闕然顏子之父路曾子之父點乃在廡下從祀之列子處父上神靈有知何以自安所謂子雖齊聖不先父食正謂是也又孟子配食與顏子並而其師子思子思之師曾子亦在下此兩者於禮於義實爲未然特相承既久莫之敢議耳



周三公不特置

周成王董正治官立太師太傅太保茲惟三公而云官不必備惟其人以書傳考之皆兼領六卿未嘗特置也周公既爲師然猶位冢宰尙書所載召公以太保領冢宰芮伯爲司徒彤伯爲宗伯畢公以太師領司馬衛侯爲司寇毛公以太傅領司空是已其所次第惟以六卿爲先後而師傅之尊乃居太保下也

周公作金縢

尙書孔氏所傳五十九篇皆有序其出於史官者不言某人作如虞書五篇紀一時君臣吁咈都兪及識其政事如說命武成顧命康王之誥召誥自惟二月既望至越自乃御事洛誥自戊辰王在新邑至篇終蔡仲之命自惟周公位冢宰至邦之蔡皆然如指言某人所作則伊尹作伊訓太甲咸有一德盤庚三篇周公作大誥康誥酒誥梓材多士無逸君奭多方立政是也惟金縢之篇首尾皆敘事而直以爲周公作按此篇除册祝三王外餘皆周史之詞如公乃自以爲功公歸納册公將不利於孺子公乃爲詩以

貽王王亦未敢誚公公命我勿敢言天動威以
彰周公之德公勤勞王家之語出郊反風之異
決非周公所自爲今不復可質究矣

雲夢澤

雲夢楚澤藪也列於周禮職方氏鄭氏曰在華
容漢志有雲夢官然其實雲也夢也各爲一處
禹貢所書雲土夢作义注云在江南惟左傳得
其詳如邳夫人棄子文于夢中注云夢澤名在
江夏安陸縣城東南楚子田江南之夢注云楚
之雲夢跨江南北楚子濟江入于雲中注入雲

澤中所謂江南之夢然則雲在江之北夢在其
南也上林賦楚有七澤嘗見其一名曰雲夢特
其小小者耳方九百里此乃司馬長卿夸言今
爲縣隸德安詢諸彼人已不能的指疆域職方
氏以夢爲晉前漢敘傳子文投於夢中音皆同

關雎不同

關雎爲國風首毛氏列之於三百篇之前大序
云后妃之德也而魯詩云后夫人雞鳴佩玉去
君所周康王后不然故詩人歎而傷之後漢皇
后紀序康王晏朝關雎作諷蓋用此也顯宗永

平八年詔云昔應門失守關雎刺世注引春秋說題辭曰人主不正應門失守故歌關雎以感之宋均云應門聽政之處也言不以政事爲務則有宣淫之心關雎樂而不淫思得賢人與之共化修應門之政者也薛氏韓詩章句曰詩人言雎鳩正潔敬正以聲相求隱蔽于無人之處故人君退朝入于私宮后妃御見有度應門擊柝鼓人上堂退反燕處體安志明今時大人內傾于色賢人見其萌故詠關雎之說淑女正容儀以刺時三說不同如此黍離之詩列於王國風之首周大夫所作也而齊詩以爲衛宣公之子壽閔其兄伋之且見害作憂思之詩黍離之詩是也此說尤爲可議

迷癡厥撥

柔詞詔笑專取容悅世俗謂之迷癡亦曰迷嬉中心有愧見諸顏面者謂之緬覲舉措脫落觸事乖忤者謂之厥撥雖爲俚言然其說皆有所本列子云墨屎單至嘽咍慙慙四人相與游於世又云眠挺誣諉勇敢怯疑四人亦相與游張湛注云墨音眉屎勅夷反方言江淮之間謂之

無賴眠音緬姪音殄方言欺謾之語也郭璞云謂以言相輕嗤弄也所釋雖不同然大略具是矣曲禮衣毋撥足毋蹶鄭氏注云撥發揚貌蹶行遽貌大抵亦指其荒率也

三館祕閣

國朝儒館仍唐制有四曰昭文館曰史館曰集賢院曰祕閣率以上相領昭文大學士其次監修國史其次領集賢若只兩相則首廳秉國史唯祕閣最低故但以兩制判之四局各置直官均謂之館職皆稱學士其下則爲校理檢討校

勘地望清切非名流不得處范景仁爲館閣校勘當遷校理宰相龐籍言范鎮有異才恬於進取乃除直祕閣司馬公作詩賀之曰延閣屹中

天積書雲漢連神宗重其選

謂太宗也

國士比爲仙

玉檻鉤陳上丹梯北斗邊帝容瞻日角宸翰照星躔職秩曾無貴光華在得賢其重如此自熙寧以來或頗用賞勞元豐官制行不置昭文集賢以史館入著作局而直祕閣只爲貼職至崇寧政宣以處大臣子弟姻戚其濫及於錢穀文俗吏士大夫不復貴重然除此職者必詣館下

拜閣乃具盛筵邀見在三館者宴集秋日暴書
宴皆得預席若餘日則不許至隨筆有館職名
存一則云

亭榭立名

立亭榭名最易蹈襲既不可近俗而務爲奇詀
亦非是東坡見一客云近看晉書問之曰曾尋
得好亭子名否蓋謂其難也秦楚材在宣城於
城外並江作亭目之曰知有用杜詩已知出郭
少塵事更有澄江消客愁之句也王仲衡在會
稽於後山作亭目之曰白涼亦用杜詩越女天
下白鑑湖五月涼之句二者可謂甚新然要爲
未當廬山一寺中有亭頗幽勝或標之曰不更
歸取韓詩末句亦可笑也

十十錢

市肆閒交易論錢陌者云十十錢言其足數滿
百無蹺減也其語至俗然亦有所本後漢書襄
楷傳引宮崇所獻神書其太平經與帝王篇云
開其玉戶施種於中比若春種於地也十十相
應和而生其施不以其時比若十月種物於地
也十十盡死固無生者其書不傳於今唐章懷

四筆一
太子注釋之時尚猶存也此所謂十十蓋言十
種十生無一失耳其盡死之義亦然與錢陌之
事殊然其字則同也

犀舟

張衡應閒云犀舟勁楫後漢注引前書羌戎弓
矛之兵器不犀利音義曰今俗謂刀兵利爲犀
犀堅也犀舟甚新奇然爲文者未嘗用亦慮予
所見之不博也

畢仲游二書

元祐初司馬溫公當國盡改王荆公所行政事
士大夫言利害者以千百數聞朝廷更化莫不
驩然相賀唯畢仲游一書究盡本末其略云昔
安石以興作之說動先帝而患財之不足也故
凡政之可以得民財者無不用蓋散青苗置市
易斂役錢變鹽法者事也而欲興作患不足者
情也苟未能杜其興作之情而徒欲禁其散斂
變置之事是以百說而百不行今遂欲廢青苗
罷市易蠲役錢去鹽法凡號爲財利而傷民者
一掃而更之則向來用事於新法者必不喜矣
不喜之人必不但曰青苗不可廢市易不可罷

役錢不可蠲鹽法不可去必探不足之情言不足之事以動上意雖致石人而使聽之猶將動也如是則廢者可復散罷者可復置蠲者可復斂去者可復存矣則不足之情可不預治哉爲今之策當大舉天下之計深明出入之數以諸路所積之錢粟一歸地官使經費可支二十年之用數年之間又將十倍於今日使天子曉然知天下之餘於財也則不足之論不得陳於前然後所謂新法者始可永罷而不復行矣昔安石之居位也中外莫非其人故其法能行今欲

抹前日之敝而左右侍從職司使者十有七八皆安石之徒雖起二三舊臣用六七君子然累百之中存其十數烏在其勢之可爲也勢未可爲而欲爲之則青苗雖廢將復散況未廢乎市易雖罷且復置況未罷乎役錢鹽法亦莫不然以此抹前日之敝如人久病而少閒其父兄子弟喜見顏色而未敢賀者意其病之在也先是東坡公在館閣頗因言語文章規切時政仲游憂其及禍貽書戒之曰孟軻不得已而後辯孔子欲無言古人所以精謀極慮固功業而養壽

命者未嘗不出乎此君自立朝以來禍福利害
繫身者未嘗言顧直惜其言爾夫言語之累不
特出口者爲言其形于詩歌贊于賦頌託于碑
銘著于序記者亦言也今知畏於口而未畏於
文是其所是則見是者喜非其所非則蒙非者
怨喜者未能濟君之謀而怨者或已敗君之事
矣天下論君之文如孫臏之用兵扁鵲之醫疾
固所指名者矣雖無是非之言猶有是非之疑
又況其有耶官非諫臣職非御史而非人所未
非是人所未是危身觸諱以游其閒殆由抱石
而掬溺也二公得書聳然竟如其慮子頃修史
時因得其集讀二書思欲爲之表見故官雖不
顯亦爲之立傳云

列子與佛經相參

張湛序列子云其書大略明羣有以至虛爲宗
萬品以終滅爲驗神惠以凝寂常全想念以著
物自喪生覺與夢化等情所明往往與佛經相
參予讀天瑞篇載林類答子貢之言曰死之與
生一往一反故死於是者安知不生於彼故吾
知其不相若矣吾又安知吾今之死不愈昔之

生乎此一節所謂與佛經相參者也又云商太宰問孔子三王五帝三皇聖者歟孔子皆曰弗知太宰曰然則孰者為聖孔子曰西方之人有聖者焉不治而不亂不言而自信不化而自行蕩蕩乎民無能名焉丘疑其為聖弗知真為聖歟真不聖歟其後論者以為列子所言乃佛也寄於孔子云

韋孟詩乖疎

漢書韋賢傳載韋孟詩二篇及其孫元成詩一篇皆深有三百篇風致但韋孟諷諫云肅肅我

祖國自豕韋總齊羣邦以翼大商至于有周歷世會同王赧聽譖實絕我邦我邦既絕厥政斯逸賞罰之行非繇王室庶尹羣后靡扶靡衛五服崩離宗周以隊應劭曰王赧聽讒受譖絕豕韋氏自是政教逸漏不由王者觀孟之自敘乃祖而乖疎如是周至赧王僅存七邑救亡不暇豈能絕侯邦乎周之積微久矣非因絕豕韋一國然後五服崩離也其妄固不待攻而應劭又從而實之尤為可笑左傳書范宣子之言曰句之祖在商為豕韋氏在周為唐杜氏杜預曰豕

四筆
韋國於東郡白馬縣殷末國於唐周成王滅之
此最可證惜顏師古之不引用也

康衡守正

漢元帝時貢禹奏言天子七廟親盡之廟宜毀
及郡國廟不應古禮宜正定天子下其議未及
施行而禹卒後乃下詔先罷郡國廟其親盡寢
園皆無復修已而上寢疾夢祖宗譴罷郡國廟
詔問丞相康衡議欲復之衡深言不可上疾久
不平衡皇恐禱高祖孝文孝武廟曰親廟宜一
居京師今皇帝有疾不豫迺夢祖宗見戒以廟

皇帝悼懼卽詔臣衡復修立如誠非禮義之中
違祖宗之心咎盡在臣衡當受其殃又告謝毀
廟曰遷廟合祭久長之策今皇帝乃有疾願復
修立承祀臣衡等咸以爲禮不得如不合諸帝
后之意罪盡在臣衡等當受其咎今詔中朝臣
具復毀廟之文臣衡以爲天子之祀義有所斷
無所依緣以作其文事如失措罪迺在臣衡予
按衡平生佞諛專附石顯以取大位而此一節
獨據經守禮其禱廟之文殆與金縢之册祝相
似而不爲後世所稱述漢史又不書於本傳憎

而知其善可也郊祀志南山巫祠秦中秦中者
二世皇帝也以其彊死魂魄爲厲故祠之成帝
時康衡奏罷之亦可書

西極化人

列子載周穆王時西極之國有化人來王敬之
若神化人謁王同游王執化人之袂騰而上者
中天乃止暨及化人之宮自以居數十年不思
其國復謁王同游意迷精喪請化人求還旣寤
所坐猶嚮者之處侍御猶嚮者之人視其前則
酒未清肴未晞王問所從來左右曰王默存耳

穆王自失者三月復問化人化人曰吾與王神
游也形奚動哉予然後知唐人所著南柯太守
黃粱夢櫻桃青衣之類皆本乎此

詔令不可輕出

人君一話一言不宜輕發況於詔令形播告者
哉漢光武初卽位旣立郭氏爲皇后矣時陰麗
華爲貴人帝欲崇以尊位后固辭以郭氏有子
終不肯當建武九年遂下詔曰吾以貴人有母
儀之美宜立爲后而固辭不敢當列於媵妾朕
嘉其義讓許封諸弟乃追爵其父及弟爲侯皆

前世妃嬪所未有至十七年竟廢郭后及太子
彊而立貴人爲后蓋九年之詔旣行主意移奪
已見之矣郭后豈得安其位乎

戰國策

劉向序戰國策言其書錯亂相揉莒本字多誤
脫爲半字以趙爲肖以齊爲立如此類者多予
按今傳於世者大抵不可讀其韓非子新序說
苑韓詩外傳高士傳史記索隱太平御覽北堂
書鈔藝文類聚諸書所引用者多今本所無向
博極羣書但擇焉不精不止於文字脫誤而已
惟太史公史記所采之事九十有三則明白光
豔悉可稽考視向爲有閒矣


范曄漢志

沈約作宋書謝儼傳曰范曄所撰十志一皆託
儼搜撰垂筆遇曄敗悉蠟以覆車宋文帝令丹
陽尹徐湛之就儼尋求已不復得一代以爲恨
其志今闕曄本傳載曄在獄中與諸生姪書曰
旣造後漢欲徧作諸志前漢所有者悉令備雖
事不必多且使見文得盡又欲因事就卷內發
論以正一代得失意復不果此說與儼傳不同

然儼傳所云乃范紀第十卷公主注中引之今
宋書卻無殊不可曉劉昭注補志三十卷至本
朝乾興元年判國子監孫奭始奏以備前史之
闕故淳化五年監中所刊後漢書凡九十卷惟
帝后紀十卷列傳八十卷而無志云新唐書藝
文志劉昭補注後漢書五十八卷不知昭爲何
代人所謂志三十卷當在其中也

繕修犯土

今世俗營建宅舍或小遭疾厄皆云犯土故道
家有謝土司章醮之文按後漢書來歷傳所載
安帝時皇太子驚病不安避幸乳母野王君王
聖舍太子廚監邴吉以爲聖舍新繕修犯土禁
不可久御然則古有其說矣



容齋四筆卷第一

容齋四筆卷第二 二十則

諸家經學興廢

稚子問漢儒所傳授諸經各名其家而今或存或不存請盡其本末爲四筆一則乃爲采摭班史及陸德明經典釋文并他書刪取綱要詳載於此周易傳自商瞿始至漢初田何以之顯門其後爲施讐孟喜梁丘賀之學又有京房費直高相三家至後漢高氏已微晉永嘉之亂梁丘之易亡孟京費氏人無傳者唯鄭康成王弼所注行于世江左中興欲置鄭易博士不果立而

粥猶爲世所重韓康伯等十人並注繫辭今唯韓傳尙書自漢文帝時伏生得二十九篇其後爲大小夏侯之學古文者武帝時出於孔壁凡五十九篇詔孔安國作傳遭巫蠱事不獲以聞遂不列於學官其本殆絕是以馬鄭杜預之徒皆謂之逸書王肅嘗爲注解至晉元帝時孔傳始出而亡舜典一篇乃取肅所注堯典分以續之學徒遂盛及唐以來馬鄭王注遂廢今以孔氏爲正云詩自子夏之後至漢興分而爲四魯申公曰魯詩齊轅固生曰齊詩燕韓嬰曰韓詩皆列博士毛詩者出於河閒人大毛公爲之故訓以授小毛公爲獻王博士以不在漢朝不列於學鄭眾賈逵馬融皆作詩注及鄭康成作箋三家遂廢齊詩久亡魯詩不過江東韓詩雖在人無傳者唯毛詩鄭箋獨立國學今所遵用漢高堂生傳士禮十七篇卽今之儀禮也古禮經五十六篇后蒼傳十七篇曰后氏曲臺記所餘二十九篇名爲逸禮戴德刪古禮二百四篇爲八十五篇謂之大戴禮戴聖又刪爲四十九篇謂之小戴禮馬融盧植考諸家異同附戴聖篇

章去其煩重及所缺畧而行於世卽今之禮記也王莽時劉歆始建立周官經以爲周禮在三禮中最爲晚出左氏爲春秋傳又有公羊穀梁鄒氏夾氏鄒氏無師夾氏無書公羊興於景帝時穀梁盛於宣帝時而左氏終西漢不顯迨章帝乃令賈逵作訓詁自是左氏大興二傳漸微矣古文孝經二十二章世不復行只用鄭注十八章本論語三家魯論語者魯人所傳卽今所行篇次是也齊論語者齊人所傳凡二十二篇古論語者出自孔壁凡二十一篇各有章句魏何晏集諸家之說爲集解今盛行於世

漢人姓名

西漢名人如公孫弘董仲舒朱買臣丙吉王褒貢禹皆有異世與之同姓名者戰國策及呂氏春秋齊有公孫弘與秦王孟嘗君言者明帝時又有幽州從事公孫弘交通楚王英見於虞延傳高祖時又有謁者貢禹梁元帝時有武昌太守朱買臣尙書左僕射王褒後漢安帝時有太子廚監邴吉南齊武帝之子巴東王子響爲荊州刺史要直閣將軍董蠻與同行蠻曰殿下癡

如雷敢相隨耶子響曰君敢出此語亦復奇癩
上聞而不悅曰人名蠻復何容得醞藉乃改爲
仲舒謂曰今日仲舒何如昔日仲舒答曰昔日
仲舒出自私庭今日仲舒降自先帝以此言之
勝昔遠矣然此人後不復見

輕浮稱謂

南齊陸慧曉立身清肅爲諸王長史行事僚佐
以下造詣必起迎之或曰長史貴重不宜妄自
謙屈答曰我性惡人無禮不容不以禮處人未
嘗卿士大夫或問其故慧曉曰貴人不可卿而
賤者乃可卿人生何容立輕重於懷抱終身常
呼人位今世俗浮薄少年或身爲卑官而與尊
者言話稱其儕流必曰某丈談其所事牧伯監
司亦然至於當他人父兄尊長之前語及其子
孫甥壻亦云某丈或妄稱宰相執政貴人之字
皆大不識事分者習慣以然元非簡傲也予常
以戒兒輩云

鬼谷子書

鬼谷子與蘇秦張儀書曰二足下功名赫赫但
春華至秋不得久茂今二子好朝露之榮忽長

久之功輕喬松之永延貴一旦之浮爵夫女愛不極席男歡不畢輪痛哉夫君戰國策楚江乙謂安陵君曰以財交者財盡而交絕以色交者華落而愛渝是以嬖女不敝席寵臣不敝軒呂不韋說華陽夫人曰以色事人者色衰而愛弛詩氓之序曰華落色衰復相棄背是諸說大抵意同皆以色而爲喻士之嗜進而不知自反者尙監茲哉

有美堂詩

東坡在杭州州作有美堂會客詩領聯云天外黑風吹海立浙東飛雨過江來讀者疑海不能立黃魯直曰蓋是爲老杜所誤因舉三大禮賦朝獻太清宮云九天之雲下垂四海之水皆立以告之二者皆句語雄峻前無古人坡和陶停雲詩有雲屯九河雪立三江之句亦用此也

張天覺小簡

張天覺熙寧中爲渝州南州宰章子厚經制夔夷狎梅州縣吏無人敢與其語部使者念獨張可亢之檄至夔子厚詢人才使者以告卽呼入同食張著道士服長揖就坐子厚肆意大言張

隨機折之落落出其上子厚大喜延爲上客歸而薦諸王介甫遂得召用政和六年張在荆南與子厚之子致平一帖云老夫行年七十有四日閱佛書四五卷早晚食米一升麵五兩肉八兩魚酒佐之以此爲常亦不服煖藥唯以呼吸氣晝夜合天度而已數數夢見先相公語論如平生豈其人在天仙閒而老夫定中神遊或遇之乎嗟乎安得奇男子如先相公者一快吾胸中哉此帖藏致平家其曾孫簡刻諸石子今年亦七十四歲姪孫偲於長興得墨本以相示聊記之云

城狐社鼠

城狐不灌社鼠不燠謂其所棲穴者得所憑依此古語也故議論者率指人君左右近習爲城狐社鼠予讀說苑所載孟嘗君之客曰狐者人之所攻也鼠者人之所燠也臣未嘗見稷狐見攻社鼠見燠何則所託者然也稷狐之字甚奇且新

用兵爲臣下利

富公奉使契丹虜主言欲舉兵公曰北朝與中

國通好則人主專其利而臣下無所獲若用兵則利歸臣下而人主任其禍故北朝羣臣爭勸舉兵者此皆其自謀非國計也勝負未可知就使其勝所亡士馬羣臣當之歟抑人主當之歟是時語錄傳於四方蘇明允讀至此曰此一段議論古人有之否東坡年未十歲在傍對日記得嚴安上書云今徇南夷朝夜郎畧葳州建城邑深入匈奴燔其龍城議者美之此人臣之利非天下之長策也正是此意明允以爲然予又記魏太武時南邊諸將表稱宋人大嚴將入寇請先其未發逆擊之魏公卿皆以爲當崔伯深曰朝廷羣臣及西北守將從陛下征伐西平赫連北破蠕蠕多獲美女珍寶南邊諸將聞而慕之亦欲南鈔以取資財皆營私計爲國生事不可從也魏主乃止其論亦然

誌文不可冗

東坡爲張文定公作墓誌銘有答其子厚之一書云志文路中已作得大半到此百冗未絕筆計得十日半月乃成然書大事略小節已有六千餘字若纖悉盡書萬字不了古無此例也知

之知之蓋當時恕之意但欲務多耳又一帖云志文謁告數日方寫得了謹遣持納衰病眼眩辭翰皆不佳不知可用否今誌文正本凡七千一百字銘詩百六十字云予鄉土作一列大夫小郡守行狀九千言衢州士人詣闕上書二萬言使讀之者豈不厭倦作文者宜戒之坡帖藏梁氏竹齋趙晉臣鐫石於湖南憲司楚觀

趙殺鳴犢

漢書劉輔傳谷永等上書曰趙簡子殺其大夫鳴犢孔子臨河而還張晏注曰簡子欲分晉國故先殺鳴犢又聘孔子孔子聞其死至河而還也顏師古曰戰國策說二人姓名云鳴犢鐸犢而史記及古今人表並以爲鳴犢竇犢蓋鐸犢及竇其聲相近故有不同耳今永等指鳴犢一人不論竇犢也韓退之將歸操亦云孔子之趙聞殺鳴犢作子按今本史記孔子世家乃以爲竇鳴犢舜華說苑權謀篇云晉有澤鳴犢犢其不同如此

五帝官天下

漢蓋寬饒奏封事引韓氏易傳言五帝官天下

三王家天下家以傳子官以傳賢若四時之運
成功者去坐指意欲求禪而死故或云自後稱
天子爲官家蓋出於此今世無韓氏易諸家注
釋漢書皆無一語惟說苑至公篇云秦始皇帝
既吞天下召羣臣議五帝禪賢三王世繼孰是
博士鮑令之對曰天下官則選賢是也天下家
則世繼是也故五帝以天下爲官三王以天下
爲家始皇帝歎曰吾德出于五帝吾將官天下
誰可使代我後者此說可以爲證輒記之以補
漢注之缺蔣濟萬機論亦有官天下家天下之

語

黃帝李法

漢書胡建傳黃帝李法蘇林曰獄官名也天文
志左角李右角將顏師古曰李者法官之號也
其書曰李法唐世系表李氏自臯陶爲堯大理
歷虞夏商世世作此官以官命族爲理氏至紂
之時逃難於伊侯之墟食木子得全遂改理爲
李氏予按今本漢書天文志騎官左角理乃用
理字而史記天官書則爲李說苑載胡建事亦
爲理法然則理李一也故左傳數云行李往來

杜預注曰行李使人也至鄭子產與晉盟于平
丘則曰行理之命注亦云行理使人通聘問者
其義益明臯陶作大理傳子孫不改迨商之季
幾千二百年世官久任倉氏庫氏不足道矣表
系疑不可信

抄傳文書之誤

今代所傳文書筆吏不謹至於成行脫漏予在
三館假庠自直類文先以正本點檢中有數卷
皆以後板爲前予令書庫整頓然後錄之他多
類此周益公以蘇魏公集付太平州鏤板亦先
爲勘校其所作東山長老語錄序云側定政宗
無用所以爲用因蹄得兔忘言而後可言以上
一句不明白又與下不對折簡來問予憶莊子
曰地非不廣且大也人之所用容足爾然而廁
足而墊之致黃泉知無用而後可以言用矣始
驗側定政宗當是廁足致泉正與下文相應四
字皆誤也因記曾絃所書陶淵明讀山海經詩
云形天無千歲猛志固常在疑上下文義若不
貫遂取山海經參校則云刑天獸名也口中好
銜干戚而舞乃知是刑天舞干戚故與下句相

應五字皆訛以語友人岑公休晁之道皆撫掌
驚歎亟取所藏本是正之此一節甚類蘇集云

二十八宿

二十八宿音秀若考其義則止當讀如本音
嘗記前人有說如此說苑辨物篇曰天之五星
運氣於五行所謂宿者日月五星之所宿也其
義昭然

大觀元夕詩

大觀初年京師以元夕張燈開宴時再復湟鄯
徽宗賦詩賜羣臣其領聯云午夜笙歌連海嶠
春風燈火過湟中席上和者皆莫及開封尹宋
喬年不能詩密走介求援於其客周子雍得句
云風生閭闔春來早月到蓬萊夜未中爲時輩
所稱子雍汝陰人曾受學於陳無已故有句法
則作文爲詩者可無師承乎

顏魯公帖

顏魯公忠義氣節史策畧盡偶閱臨汝石刻見
一帖云政可守不可不守吾去歲中言事得罪
又不能逆道苟時爲千古罪人也雖貶居遠方
終身不恥汝曹當須謂吾之志不可不守也此

是獨赴謫地而與其子孫者無由考其歲月千載之下使人讀之尚可畏而仰也

文潞公奏除改官制

自熙寧以來士大夫資歷之法日趨於壞歲甚一歲久而不可復清近年愈甚綜核之制未嘗能守偶見文潞公在元祐中任平章軍國重事宣仁面諭合具自來除授官職次序一本進呈公遂具除改舊制節目以奏其一云吏部選兩任親民有舉主升通判通判兩任滿有舉主升知州軍謂之常調知州軍有績効或有舉薦名

實相副者特擢升轉運使副判官或提點刑獄府推判官謂之出常調轉運使有路分輕重遠近之差河北陝西河東三路爲重路歲滿多任三司使副或發運使發運任滿亦充三司副使成都路次三路京東西淮南又其次江東西荆湖兩浙又次之二廣福建梓利夔路爲遠小已上三等路分轉運任滿或就移近上次等路分或歸任省府判官漸次擢充三路重任內提點刑獄則不拘路分輕重除授潞公所奏乃是治平以前常行今一切蕩然矣京朝官未嘗肯兩

任親民纔爲通判便望州郡至於監司旣無輕重遠近之間不復以序升擢云

待制知制誥

慶祿七年曾魯公公亮自修起居注除天章閣待制時陳恭公獨爲相其弟婦王氏冀公孫女曾出也當月旦出拜恭公迎語之曰六新婦曾三做從官想甚喜應聲對曰三舅荷伯伯提挈極驩喜只是外婆不樂恭公問故曰外婆見三舅來謝責之曰汝第五人及第當過詞掖想是全廢學故朝廷如此處汝恭公默然自失後竟改知制誥蓋恭公不由科第不諳典故致受譏於女子而此女對答之時元未嘗往外家也其警慧如此國家故事修注官次補必知制誥惟趙康靖公以歐陽公位在下而欲先遷司馬公以力辭三字皆除待制其雜壓先後可見云


裴行儉景陽


裴行儉爲定襄道大總管討突厥大軍次單于北暮已立營塹壕旣周更命徒營高岡吏白士安堵不可擾不聽促徙之比夜風雨暴至前占營所水深丈餘眾莫不駭歎問何以知之行儉

四筆二
三
曰自今第如我節制毋問我所以知也按戰國策云齊韓魏共攻燕楚王使景陽將而救之暮舍使左右司馬各營壁地已植表景陽怒曰女所營者水皆至滅表此焉可以舍乃令徙明日大雨山水大出所營者水皆滅表軍吏乃服二事正同而景陽之事不傳

北人重甘蔗

甘蔗只生於南方北人嗜之而不可得魏太武至彭城遣人於武陵王處求酒及甘蔗郭汾陽在汾上代宗賜甘蔗二十條子虛賦所云諸柘巴且諸柘者甘柘也蓋相如指言楚雲夢之物漢郊祀歌泰尊柘漿亦謂取甘蔗汁以爲飲





容齋四筆卷第二

容齋四筆卷第三十六則

韓退之張籍書

韓公集中有答張籍二書其前篇曰吾子所論
 排釋老不若著書若僕之見則有異乎此請待
 五六十然後為之吾子又譏吾與人為無實駁
 雜之說此吾所以為戲耳若商論不能下氣或
 似有之博塞之譏敢不承教後篇曰二氏行乎
 中土蓋六百年非可以朝令而夕禁俟五六十
 為之未失也謂吾與人商論不能下氣若好勝
 者雖誠有之抑非好己勝也好己之道勝也駁

雜之譏前書盡之昔者夫子猶有所戲烏害於道哉大略籍所論四事乞著書譏駁雜諫商論好勝及搏塞也今得籍所與書前篇曰漢之衰浮圖之法入中國黃老之術相沿而熾盍爲一書以興存聖人之道執事多尙駁雜無實之說使人陳之前以爲懼此有累於盛德又商論之際或不容人之短如任私尙勝者亦有所累也況爲搏塞之戲與人競財乎廢棄日時不識其然願絕搏塞之好棄無實之談弘慮以接士嗣孟軻揚雄之作使聖人之道復見於唐後篇曰老釋惑於生人久矣執事可以任著書之事君子汲汲於所欲爲若皆待五十六十而後有所爲則或有遺恨矣君子發言舉足不遠於禮未聞以駁雜無實之說以爲戲也執事每見其說則拊抃呼笑是撓氣害性不得其正矣籍之二書甚勁而直但稱韓公爲執事不曰先生考其時乃云執事參於戎府按韓公以貞元十二年爲汴州推官時年二十有九十五年爲徐州推官時年三十有二年位未盛籍未以師禮事之云

韓公稱李杜

新唐書杜甫傳贊曰昌黎韓愈於文章重許可至歌詩獨推曰李杜文章在光焰萬丈長誠可信云子讀韓詩其稱李杜者數端聊疏於此石鼓歌曰少陵無人謫僊死才薄將柰石鼓何酬盧雲夫曰高揖羣公謝名譽遠追甫白感至誠薦士曰勃興得李杜萬類困凌暴醉留東野曰昔年因讀李白杜甫詩長恨二人不相從感春曰近憐李杜無撿束爛漫長醉多文辭并唐志所引蓋六用之

此日足可惜

韓退之此日足可惜一首贈張籍凡百四十句雜用東冬江陽庚青六韻及其亡也籍作詩祭之凡百六十六句用陽庚二韻其語鏗鏘震厲全倣韓體所謂乃出二侍女合彈琵琶箏者是也

粉白黛黑

韓退之爲文章不肯蹈襲前人一言一句故其語曰惟陳言之務去曷曷乎其難哉獨粉白黛綠四字似有所因列子周穆王築中天之臺簡

鄭衛之處子娥媼靡曼者粉白黛黑以滿之戰國策張儀謂楚王曰鄭周之女粉白黛黑立於衢間見者以爲神屈原大招粉白黛黑施芳澤只司馬相如靚莊刻飾郭璞曰粉白黛黑也淮南子毛嬙西施施芳澤正娥眉設笄珥衣阿錫粉白黛黑笑目流眇韓公以黑爲綠其旨則同

李杜往來詩

李太白杜子美在布衣時同游梁宋爲詩酒會心之友以杜集考之其稱太白及懷贈之篇甚多如李侯金閨彥脫身事幽討南尋禹穴見李

白道甫問訊今何如李白一斗詩百篇自稱臣是酒中僊近來海內爲長句汝與山東李太白好昔者與高李晚登單父臺李侯有佳句往往似陰鏗憶與高李輩論交入酒壚白也詩無敵飄然思不羣昔年有狂客號爾謫僊人落月滿屋梁猶疑照顏色三夜頻夢君情親見君意秋來相顧尙飄蓬未就丹砂愧葛洪寂寞書齋裏終朝獨爾思涼風起天末君子意何如不見李生久佯狂真可哀凡十四五篇至於太白與子美詩略不見一句或謂堯祠亭別杜補闕者是已

乃殊不然杜但爲右拾遺不曾任補闕兼自諫
省出爲華州司功迺避避難入蜀未嘗復至東
州所謂飯顆山頭之嘲亦好事者所撰耳

李太白怖州佐

李太白上安州裴長史書云白竊慕高義得趨
末塵何圖謗言忽生眾口攢毀將恐投杼下客
震於嚴威若使事得其實罪當其身則將浴蘭
沐芳自屏於烹鮮之地惟君侯死生之願君侯
惠以大遇洞開心顏終乎前恩再辱英眄必能
使精誠動天長虹貫日若赫然作威加以大怒

卽膝行而前再拜而去耳裴君不知何如人至
譽其貴而且賢名飛天京天才超然度越作者
稜威雄雄下懼羣物予謂白以白衣入翰林其
蓋世英姿能使高力士脫鞵於殿上豈拘拘然
怖一州佐者邪蓋時有屈伸正自不得不爾大
賢不偶神龍困於螻蟻可勝歎哉白此書自敘
其平生云昔與蜀中友人吳指南死於洞庭之
上白禪服慟哭炎月伏屍猛虎前臨堅守不動
遂權殞於湖側數年來觀筋骨尚在雪泣持刃
躬申洗削裹骨徒步負之而趨寢輿攜持無輟

四三
五
身手遂丐貨營葬於鄂城其存交重義如此又與逸人東巖子隱於岷山巢居數年不跡城市養奇禽千計呼皆就掌取食了無驚猜其養高忘機如此而史傳不爲書之亦爲未盡

祝不勝詛

齊景公有疾梁丘據請誅祝史晏子曰祝有益也詛亦有損聊攝以東姑尤以西其爲人也多矣雖其善祝豈能勝億兆人之詛晉中行寅將亡召其太祝欲加罪曰子爲我祝齋戒不敬使吾國亡祝簡對曰今舟車飾賦斂厚民怨謗詛多矣苟以爲祝有益於國則詛亦將爲損一人祝之一國詛之一祝不勝萬詛國亡不亦宜乎祝其何罪此二說若出一口眞藥石之言也

呂子論學

呂子曰天生人而使其耳可以聞不學其聞則不若聾使其目可以見不學其見則不若盲使其口可以言不學其言則不若暗使其心可以智不學其智則不若狂故凡學非能益之也達天性也能全天之所生而勿敗之可謂善學者矣此說甚美而罕爲學者所稱故書以自戒

會太皇太后

唐德宗卽位訪求其母沈太后歷順宗及憲宗時爲會祖母故稱爲會太皇太后蓋別於祖母也舊新二唐書紀皆載之今慈福太皇太后在壽康太上時已加尊稱若於主上則爲會祖母當用唐故事加會字向者嘗以告宰相而省吏以爲典故所無天子逮事三世安得有前比亦可謂不知禮矣又嗣濮王士欽在隆興爲從叔祖在紹熙爲會叔祖慶元爲高叔祖矣而仍稱皇叔祖如故士欽視嗣秀王伯圭爲從祖今圭稱皇伯祖而歆但爲皇叔祖乃是弟爾禮寺亦以爲國朝以來無稱會高者彼蓋不知累朝尊屬元未之有也

中天之臺

中天之臺有二其一列子曰西極化人見周穆王王爲之改築宮室土木之功赭堊之色無遺巧焉五府爲虛而臺始成其高千仞臨終南之上名曰中天之臺其一新序曰魏王將起中天臺許綰負操鍤入曰臣能商臺王曰若何曰天與地相去萬五千里今王因而半之當起七千

四筆三
五百里之臺高既如其趾須方八千里盡王之地不足以爲臺趾必起此臺先以兵伐諸侯盡有其地又伐四夷得方八千里乃足以爲臺趾度八千里之外當定農畝之地足以奉給王之臺者臺具以備乃可以作王默然無以應乃罷起臺

實年官年

士大夫敘官闕有所謂實年官年兩說前此未嘗見於官文書大抵布衣應舉必減歲數蓋少壯者欲藉此爲求昏地不幸潦倒場屋勉從特

恩則年未六十始許入仕不得不豫爲之圖至公卿任子欲其早列仕籍或正在童孺故率增擡庚甲有至數歲者然守義之士猶曰兒曹甫策名委質而父祖先導之以挾詐欺君不可也比者以朝臣屢言年及七十者不許任監司郡守搢紳多不自安爭引年以決去就江東提刑李信甫雖春秋過七十而官年損其五堅乞致仕有旨官年未及與之外祠知房州章騶六十八歲而官年增其三亦求罷去諸司以其精力未衰援實爲請有旨聽終任知嚴州秦焞乞祠

之疏曰實年六十五而官年已踰七十遂得去
齊慶冑寧國乞歸亦曰實年七十而官年六十
七於是實年官年之字形於制書播告中外是
君臣上下公相爲欺也掌故之野甚矣此豈可
紀於史錄哉

雷公炮炙論

雷公炮炙論載一藥而能治重疾者今醫家罕
用之聊志於此其說云髮眉墮落塗半夏而立
生目辟眼瞤有五花而自正腳生肉杓裊繫若
根囊皺漩多夜煎竹木體寒腹大全賴鷓鴣血
泛經過飲調瓜子咳逆數數酒服熟雄遍體癩
風冷調生側腸虛泄利須假草零久渴心煩宜
投竹瀝除癥去塊全仗硝礬益食加觴須煎蘆
朴強筋健骨須是菴蟬駐色延年精蒸神錦知
瘡所在口點陰膠產後肌浮甘皮酒服腦痛鼻
投硝末心痛速覓延胡凡十八項謂眉髮墮落
者煉生半夏莖取涎塗髮落處立生五花者五
加皮也葉有雄雌三葉爲雄五葉爲雌須使五
葉者作末酒浸用之目瞤者正腳有肉杓者取
萸若根繫裊帶上永痊多小便者煎葶藶服之

永不夜起若患腹大如鼓米飲調鷓鴣末服立
枯如故血泛行者搗甜瓜子仁作末去油飲調
服之立絕咳逆者天雄炮過以酒調一錢匕服
癰風者側子附子傍生者作末冷酒服虛泄者搗五
倍子末熟水下之癥塊者以硃砂硝石二味乳
鉢中研作粉同煨了酒服神効不飲者并飲酒
少者煎逆水蘆根并厚朴二味湯服之菴蓉并
鱓魚作末以黃精汁圓服之可力倍常日也黃
精自然汁拌細研神錦於柳木甌中蒸七日了
以蜜圓服顏貌可如幼女之容色陰膠卽是甌

中氣垢點少許於口中卽知臟腑所起直徹至
住處知痛足可醫也產後肌浮酒服甘皮立枯
頭痛者以硝石作末內鼻中立止心痛者以延
胡索作散酒服之

治藥捷法

藥有至賤易得人所常用而難於修製者如香
附子菟絲子艾葉之類醫家昧其節度或終日
疲勞而不能成本草云凡菟絲子煖湯淘汰去
沙土漉乾煖酒漬經一宿漉出暴微白搗之不
盡者更以酒漬經三五日乃出更晒微乾搗之

須臾悉盡極易碎蓋以其顆細難施工其說亦殊勞費然自有捷法但撚紙條數枚寘其間則馴帖成粉香附子洗去皮毛炒之焦熟然後舉投水鉢內候浸漬透徹漉出暴日中微燥乃入搗臼悉應手糜碎艾葉柔軟不可著力若入白茯苓三五片同碾則卽時可作細末

陳翠說燕后

趙左師觸龍說太后使長安君出質用愛憐少子之說以感動之子嘗論之於隨筆中其事載於戰國策史記資治通鑑而燕語中又有陳翠

一段甚相似云陳翠合齊燕將合燕王之弟爲質於齊太后大怒曰陳公不能爲人之國則亦已矣焉有離人子母者翠遂入見后曰人主之愛子也不如布衣之甚也非徒不愛子也又不愛丈夫子獨甚太后曰何也對曰太后嫁女諸侯奉以千金今王願封公子羣臣曰公子無功不當封今以公子爲質且以爲功而封之也太

后弗聽是以知人主之不愛丈夫子獨甚也且太后與王幸而在故公子貴太后千秋之後王棄國家而太子卽位公子賤於布衣故非及太

四筆三
后與王封公子則終身不封矣太后曰老婦不知長者之計乃命爲行具此語與觸龍無異而史記不書通鑑不取學者亦未嘗言

燕非強國

北燕在春秋時最爲僻小能自見於中國者不過三四大率制命於齊七雄之際爲齊所取後賴五國之力樂毅爲將然後勝齊然卒於得七十城不能守也故蘇秦說趙王曰趙北有燕燕固弱國不足畏也燕王曰寡人國小西迫強秦南近齊趙齊趙疆國也又曰天下之戰國七而燕處弱焉獨戰則不能有所附則無不重昭王謂郭隗曰孤極知燕弱小不足以報齊蘇代曰一齊之疆燕猶不能支奉陽君曰燕弱國也東不如齊西不如趙趙長平之敗壯者皆死燕以二千乘攻之爲趙所敗太子丹謂荆軻曰燕小弱數困於兵何足以當秦楚漢之初趙王武臣爲燕軍所得趙廝養卒謂其將曰一趙尙易燕況以兩賢王滅燕易矣彭寵以漁陽叛卽時夷滅十六國之起戎狄亂華稱燕稱趙者多矣未嘗有只據幽薊之地者也獨安祿山以三十年

節制之威又兼領河東乘天寶政亂出不意而
舉兵史思明繼之雖爲天下之禍旋亦殄滅至
於藩鎮擅地所謂范陽盧龍固常受制於天雄
成德也劉仁恭守光父子僭竊一方唐莊宗遣
周德威攻之克取巡屬十餘州如拾地芥石晉
割賂契丹仍其舊國恃以爲強然晉開運陽城
之戰德光幾不免周世宗小振之立下三關但
太平興國失於輕舉又不治敗將喪師之罪致
合披猖以迄于今若以謂幽燕爲用武之地則
不然也

水旱祈禱

海內雨暘之數郡異而縣不同爲守爲令能以
民事介心必自知以時禱祈不待上命也而省
部循案故例但視天府爲節下之諸道轉運司
使巡內州縣各詣名山靈祠精潔致禱然固難
以一槩論乾道九年秋韜吉連雨暴漲予守韜
方多備土囊壅諸城門以杜水入凡二日乃退
而臺符合禱雨子格之不下但據實報之已而
聞吉州於小廳設祈晴道場大廳祈雨問其故
郡守曰請霽者本郡以淫潦爲災而請雨者朝

旨也其不知變如此殆爲威侮神天幽冥之下
將何所據憑哉俚語笑林謂兩商人入神廟其
一陸行欲晴許賽以豬頭其一水行欲雨許賽
羊頭神顧小鬼言晴乾喫豬頭雨落吃羊頭有
何不可正謂此耳坡詩云耕田欲雨刈欲晴去
得順風來者怨若使人人禱輒遂造物應須日
千變此意未易爲庸俗道也

容齋四筆卷第三

容齋四筆卷第四

十五則

今日官冗

元豐中曾鞏判三班院

今侍右也

上疏言國朝景德

墾田百七十萬頃官萬員皇祐二百二十五萬
頃官二萬員治平四百三十萬頃官二萬四千
員田日加辟官日加多而後之郊費視前一倍
以三班三年之籍較之其入籍者幾七百人而
死亡免退不能二百是年增歲溢未見其止則
用財之端入官之門當令有司講求其故使天
下之人如治平而財之用官之數同景德以三

十年之通可以餘十年之蓄矣是時海內全盛
倉庫多有椿積猶有此懼慶元二年四月有朝
臣奏對極言云曩在乾道間京朝官三四千員
選人七八千員紹熙二年四選名籍尙左京官
四千一百五十九員尙右大使臣五千一百七
十三員侍左選人一萬二千八百六十九員侍
右小使臣一萬一千三百十五員合四選之數
共二萬三千五百十六員冗倍於國朝全盛之
際近者四年之閒京官未至增添外選人增至
一萬三千六百七十員比紹熙增八百一員大使臣六千

五百二十五員

比紹熙增一千三百四十八員

小使臣一萬八

千七百五員

比紹熙增七千四百員

而今年科舉明年奏

薦不在焉通無慮四萬三千員比四年之數增
萬員矣可不爲之寒心哉蓋連有覃霈慶典屢
行而宗室推恩不以服派近遠爲閒斷特奏名
三舉皆值異恩雖助教亦出官歸正人每州以
數十百病在膏肓正使俞跗扁鵲持上池良藥
以救之亦無及已

樂城和張安道詩

張文定公在蜀一見蘇公父子卽以國士許之

熙寧中張守陳州南都辟子由幕府元豐初東坡謫齊安子由貶監筠酒稅與張別張悽然不樂酌酒相命手寫一詩曰可憐萍梗飄蓬客自歎匏瓜老病身從此空齋掛塵榻不知重掃待何人後七年子由召還猶復見之於南都及元符末自龍川還許昌因姪叔黨出坡遺墨再讀張所贈詩其薨已十年泣下不能已乃追和之曰少年便識成都尹中歲仍爲幕下賓待我江西徐孺子一生知己有斯人兩詩皆哀而不怨使人至今有感於斯文今世薄夫受人異恩轉眼若不相識況於一死一生拳拳如此忠厚之至殆可端拜也

和范杜蘇四公

晉相和疑以唐長興四年知貢舉取范質爲第十三人唐故事知貢舉者所放進士以己及第時名次爲重謂之傳衣鉢蓋疑在梁正明中居此級故以處質且云他日當如我後皆至宰相封魯國公官至太子太傅當時以爲榮疑壽止五十八質止五十四三朝史質本傳亦書之而新五代史和疑傳誤爲第五以登科記考之而

非也杜祁公罷相以太子少師致仕後以南郊免陪位恩連進至太子太師年八十而薨蘇子容初筮仕爲南京判官杜公方里居告以平生出處本末曰子異日所至亦如老夫及蘇更踐中外名德殊與之相似集中有謝杜公書正敘此事其罷相也亦以太子太師致仕進太保年八十二而薨昔賢謂貴人往往善相人以所閱多之故也此二者併官爵年壽皆前知異矣

外臺祕要

外臺祕要載制虎方云到山下先閉氣三十五息所在山神將虎來到吾前乃存吾肺中有白帝出收取虎兩目塞吾下部中乃吐肺氣上自通冠一山林之上於是復久又閉氣三十五息兩手捻都監目作三步步皆以右足在前乃止祝曰李耳李耳圖汝非李耳邪汝盜黃帝之犬黃帝教我問汝云何畢便行一山虎不可得見若卒逢之者因正面立大張左手五指側之極勢跳手上下三度於跳中大喚咄曰虎北斗君使汝去虎卽走予謂人卒逢虎魂魄驚怖竄伏之不暇豈能雍容步趨仗呪語七字而脫邪因

讀此方聊書之以發一笑此書乃唐王珪之孫
燾所作本傳云燾視母疾數從高醫游遂窮其
術因以所學作書討繹精明世寶焉蓋不深考
也

六枳關

盤洲種枳六本以爲藩籬之限立小門名曰六
枳關每爲人問其所出倦於酬應今取馮衍顯
志賦中語書於此衍云撻六枳而爲籬按東觀
漢記作八枳逸周書小開篇云嗚呼汝何敬非
時何擇非德德枳維大人大人枳維公公枳維

卿卿枳維大夫大夫枳維士登登皇皇維在國
枳國枳維都都枳維邑邑枳維家家枳維欲無
疆言上下相維遞爲藩蔽也其數有八與東觀
記同予詳考之乃九枳也宋景文公賀宰相啟
式維公枳蓋用此云

王荆公上書拜詩

王荆公議論高奇果於自用嘉祐初爲度支判
官上萬言書以爲今天下財力日以困窮風俗
日以衰壞患在不知法度不法先王之政故也
法先王之政者法其意而已法其意則吾所改

易更革不至乎傾駭天下之耳目而固已合矣
因天下之力以生天下之財取天下之財以供
天下之費自古治世未嘗以不足爲公患也患
在治財無其道爾在位之人才既不足而閭巷
草野之閒亦少可用之材社稷之託封疆之守
陛下其能久以天幸爲常而無一旦之憂乎願
監苟且因循之敝明詔大臣爲之以漸期爲合
於當世之變臣之所稱流俗之所不講而議者
以爲迂闊而熟爛者也當時富韓二公在相位
讀之不樂知其得志必生事後安石當國其所

注措大抵皆祖此書又不忍貧民而深疾富民
志欲破富以惠貧嘗賦兼并詩一篇曰三代子
百姓公私無異財人主擅操柄如天持斗魁賦
予皆自我兼并乃姦回姦回法有誅勢亦無自
來後世始倒持黔首遂難裁秦王不知此更築
懷清臺禮義日已媮聖經久埋埃法尙有存者
欲言時所哈俗吏不知方培克乃爲才俗儒不
知變兼并可無摧利孔至百出小人司闔開有
司與之爭民愈可憐哉其語絕不工迨其得政
設青苗法以奪富民之利民無貧富兩稅之外

皆重出息十二呂惠卿復作手實之法民遂大病其禍源於此詩蘇子由以爲昔之詩病未有若此其酷也痛哉

左黃州表

唐肅宗時王璵以祠禱見寵驟得宰相帝嘗不豫璵遣女巫乘傳分禱天下名山大川巫皆盛服中人護領所至干託州縣賂遺狼藉時有一巫美而豔以惡少年數十自隨尤儉狡不法馳入黃州刺史左震晨至館請事門鏑不啟震怒破鏑入取巫斬廷下悉誅所從少年籍其贓得

十餘萬因遣還中人璵不能詰帝亦不加罪震剛決如此而史不記其他事予讀元次山集有左黃州表一篇云乾元己亥贊善大夫左振出爲黃州刺史下車黃人歌曰我欲逃鄉里我欲去墳墓左公今旣來誰忍棄之去後一歲又歌曰吾鄉有鬼巫惑人人不知天子正尊信左公能殺之蓋此巫黃人也振在州三遷侍御史判金州刺史將去黃人多去思故爲作表子謂振也卽震爲政宜民見於歌頌史官當特書之於循吏中而僅能不沒其實故爲標顯於此己亥者

乾元二年璵以元年五月自太常少卿拜中書相二年三月罷本紀及宰相表同而新史本傳以爲三年自太常卿拜相明日罷失之矣乃承舊史之誤也

李郭詔書

唐代宗卽位郭汾陽爲近昵所搖懼禍之及表上自靈武河北至于絳州兩朝所詔詔書一千餘卷家傳載其表語其多如是又讀韋端符所撰李衛公故物記云三原令座中有客曰李承者衛公之冑藏文帝賜書二十通多言征討事厚勞苦其兵事節度皆付公吾不從中治也暨公疾親詔者數四其一曰有晝夜視公病大老嫗令一人來吾欲熟知公起居狀權文公視此詔常泣曰君臣之際乃如是耶新史載其事云靖五代孫彥芳大和中爲鳳翔司錄參軍以高祖太宗賜靖詔書數函上之天子悉留禁中又勅摹詔本還賜彥芳卽二事觀之唐世之所以眷禮名將相者綢繆熟復至此漢晉以來所不及也

兩道出師

國家用兵行師異道並出其勝敗功罪當隨其實而處之則賞信罰明人知勸戒漢武帝遣衛青霍去病伐匈奴去病以功益封又封部將四人爲列侯而青不得益封軍吏卒皆無封侯者宣帝遣田廣明等五將軍擊匈奴又以常惠護烏孫兵共出五將皆無功而廣明及田順以罪誅獨常惠奉使克獲封侯宋文帝伐魏雍州諸將柳元景等旣拔弘農陝城戍潼關矣而上以東軍王玄謨敗退皆召還其後玄謨貶黜元景受賞紹興七年淮西大帥劉少師罷湖北岳少保以母憂去累辭起復之命朝廷以兵部尙書呂安老侍郎張淵道分使兩部已而正除宣撫遂掌其軍岳在九江憂兵柄一失不容再得亟兼程至鄂有旨復故任而召淵道爲樞密都承旨安老在廬遭變言者論罷張魏公淵道亦繼坐斥隆興中北虜再動兵張公爲督帥遣李顯忠邵宏淵攻符離失利而退一府皆貶秩是時汪莊敏以參知政事督視荆襄東西不相爲謀乃亦坐譴古今不侔如此

杜韓用歇後語

杜韓二公作詩或用歇後語如懷其望呂葛仙
鳥仙花吾友于友于皆挺拔再接再礪乃僮僕
誠自劓爲爾惜居諸誰謂貽厥無基趾之類是
已

唐明皇賜二相物

唐明皇以李林甫爲右相顏付大政而左相牛
仙客李適之陳希烈前後同列皆拱手備員林
甫死楊國忠代之其寵遇愈甚天寶十三載上
御躍龍殿門張樂宴羣臣賜右相絹一千五百
匹綵羅三百匹綵綾五百匹而賜左相絹三百
羅綾各五十而已其多寡不侔至於五倍如希
烈庸才知上恩意安得不奴事之乎宜其甘心
臣於祿山也

一百五日

今人謂寒食爲一百五者以其自冬至之後至
清明歷節氣六凡爲一百七日而先兩日爲寒
食故云他節皆不然也杜老有鄜州一百五日
夜對月一篇江西宗派詩云一百五日足風雨
三十六峰勞夢魂一百五日寒食雨二十四番
花信風之類是也吾州城北芝山寺爲禁煙遊

賞之地寺僧欲建華嚴閣請予作勸緣疏其末
一聯云大善知識五十三永壯人天之仰寒食
清明一百六鼎來道俗之觀或問一百六所出
應之曰元微之連昌宮詞初過寒食一百六店
舍無煙宮樹綠是以用之

老杜寒山詩

老杜春日憶李白詩云白也詩無敵飄然思不
羣清新庾開府俊逸鮑參軍嘗有武弁議其失
曰既是無敵又卻似庾鮑或折之曰庾清新而
不能俊逸鮑俊逸而不能清新太白兼之所以
爲無敵也今集別本一作無數殆好事者更之
乎寒山子詩云吾心似秋月碧潭清皎潔無物
堪比倫教我如何說人亦有言既似秋月碧潭
乃以爲無物堪比何也蓋其意謂若無二物比
倫當如何說耳讀者當以是求之

礬石之毒

讀黃伯思東觀餘論內評王大令書一節曰靜
息帖云礬石深是可疑事兄熹患散輒發癰散
者寒食散之類散中蓋用礬石是性極熱有毒
故云深可疑也劉表在荊州與王粲登障山見

一岡不生百草粲曰此必古冢其人在世服生
礬石熱蒸出外故草木焦滅鑿看果墓礬石滿
瑩又今洛水冬月不冰古人謂之溫洛下亦有
礬石今取此石置甕水中水亦不冰又鶴伏卵
以助煖氣其烈酷如此固不宜餌服子敬之語
實然淮南子曰人食礬石死蠶食之而不饑子
仲兄文安公鎮金陵因秋暑減食當塗醫湯三
益教以服礬石圓已而飲啖日進遂加意服之
越十月而毒作鼻衄血斗餘自是數數不止竟
至精液皆竭迨於捐館偶見其語使人追痛因
書之以戒未來者


會合聯句

韻略上聲二腫字險窄予向作汪莊敏銘詩八
十句唯蕭敏中讀之曰押盡一韻今考之猶有
十字越用一董內韻其詞曰維天生材萬彙傾
竦侯王將相曾是有種公家江東世繹耕壟桃
谿之埃是播是穗孰丰厥培藝此圭珙公羈未
奮逸駕思駮沈酣春秋蹈迪周孔徑策名第稍
辭渫燭橫經湘沅士敬如捧蓬萊方丈佩飾有
琫應龍天飛蒼蔚雲滃干官在序摩厲從與吾

惟片言借箸泉湧正冠霜臺過者卞悚顏顏殿
阨聲氣不動顯仁東轅巫史呼洵昌言一下恩
浹千豕獯粥孔熾邊戒毛毳媿嬰當位左掣右
壅公云當令沸渭混瀕天威震耀誰不憤踊遂
遷中司西柄是董出關啟旆籌檄倥偬業業荆
襄將懦日拱投袂電赴如尊乃勇鄧唐蔡陳馳
捷系踵佛狸歸虺民恃不恐璽書賜朝百揆參
總亞勛贊冊國勢尊鞏督軍載西寄責采重方
規許洛事援秦隴符離罔功奇畫膠葦鈞樞建
使宰席亢寵還臨西州夾道歡擁有銜未鬯病

癖且虺曾不憇遺使我心憎湘湖高丘草木蔚
蔚維水容裔維山龍從矢其銘詩詞費以亢柰
何乎公萬禩毋聳若韓孟籍徹會合聯句三十
四韻除蝻蛹二字韻略不收外餘皆不出二腫
中雄奇激越如大川洪河不見涯涘非瑣瑣潢
汙行潦之水所可同語也其詩曰離別言無期
會合意采重病添兒女戀老喪丈夫勇劔心知
未死詩思猶孤聳愁去劇箭飛謹來若泉涌析
言多新貫攄抱無昔壅念難須勤追悔易勿輕
踵吟巴山犖巒說楚波堆壘馬辭虎豹怒舟出

蛟鼉恐狂鯨時孤軒幽狹雜百種瘴衣常腥膩
蠻器多疎穴剝苔吊斑林角飯餌沈塚忽爾銜
遠命歸歟舞新寵鬼窟脫幽妖天居覲清拱京
遊步方振謫夢意猶恂詩書誇舊知酒食接新
奉嘉言寫清越瘵病失肱腫夏陰偶高庇宵魂
接虛擁雪弦寂寂聽茗盃纖纖捧馳輝燭浮螢
幽響泄潛蜚詩老獨何心江疾有餘虺我家本
漣穀有地介臯鞏休跡憶沈冥峩冠慙闕燭升
朝高轡逸振物羣聽悚徒言濯幽泌誰與薙荒
茸朝紳鬱青綠馬飾曜珪琪國讐未銷鑠我志
蕩邛隴君才誠倜儻時論方洵溶格言多彪蔚
縣解無桔萃張生得淵源寒色拔山豕堅如撞
羣金眇若抽獨蛹伊余何所擬跛鼈詎能踊塊
然墮岳石飄爾胥巢翫龍旆垂天衢雲韶凝禁
甬君胡眠安然朝鼓聲洵洵其閒或有類句然
眾手立成理如是也



容齋四筆卷第四



71021574

